

樂府詩集

樂府詩集卷第八

太原

郭茂倩

編次

郊廟歌辭

漢安世房中歌

通典曰周有房中之樂歌后妃之德秦始
皇二十六年改曰壽人漢書禮樂志曰漢
房中祠樂高祖唐山夫人所作凡樂樂其
所生禮不忘其本高祖樂楚聲故房中樂
楚聲也孝惠二年使樂府令夏侯寬備其
簫管更名安世樂宋書樂志曰魏文帝黃
初二年議者以房中歌后妃之德所以風

天下正夫婦乃改爲正始之樂明帝太和
初繆襲奏魏國初建王粲所作登歌安世
詩專以思詠神靈及說神靈鑒享之意後
省讀漢安世詩無有二南風化天下之言
又改曰享神歌

大孝備矣休德昭清高張四縣樂充宮廷芬樹羽林雲
景杳冥金支秀華庶旄翠旌七始華始肅倡和聲神來
宴娛庶幾是聽

嚮嚮音送細齊人情忽乘青玄熙事備成清思聊聊經
緯冥冥

我定歷數人告其心敕身齊戒施教申申乃立祖廟敬

明尊親大矣孝熙四極爰轅

王侯秉德其鄰翼翼顯明昭式清明嚶矣皇帝孝德竟
全大功撫安四極

海內有姦紛亂東北詔撫成師武侯承德行樂交逆簫
勺羣慝肅爲濟哉蓋定燕國

大海蕩蕩水所歸高賢愉愉民所懷大山崔百卉殖民
何貴貴有德

安其所樂終產樂終產世繼緒飛龍秋游上天高賢愉
樂民人

豐草萋女羅施善何如誰能回大莫大成教德長莫長
被無極

雷震震電耀耀明德鄉治本約治本約澤弘大加被寵
咸相保施德大世曼壽

都荔遂芳窅窅桂華孝奏天儀若日月光乘玄四龍回
馳北行羽旄殷盛芬哉芒芒孝道隨世我署文章□□
桂華馮馮翼翼承天之則吾易久遠燭明四極

慈惠所愛美若休德杳杳冥冥克綽永福美芳磴磴卽
卽師象山則

嗚呼孝哉案撫戎國蠻夷竭歡象來致福兼臨是愛終
無兵革

嘉薦芳矣告靈饗矣告靈既饗德音孔臧惟德之臧建
侯之常承保天休令問不忘

皇皇鴻明蕩侯休

嘉一作

德嘉承天和伊樂厥福在樂不

荒惟民之則浚則師德下民咸殖令問在舊孔容翼翼

孔容之常承帝之明下民之樂子孫保光承順溫良

一作

則受帝之光嘉薦令芳壽考不忘

承帝明德師象山則雲施稱民永受厥福承容之常承

帝之明下民安樂受福無疆

晉宗廟歌

傳玄

南齊書樂志曰晉泰始中傅玄造祠廟夕

牲昭夏歌一篇迎送神肆夏歌一篇登歌

七廟七篇饗神歌二篇玄云登歌歌盛德

之功烈故廟異其文饗神猶周頌之有瞽

及雍但說祭饗神明禮樂之盛七廟饗神
皆用之

夕牲歌

我夕我牲猗歎敬止嘉泰孔時供茲享祀神鑒厥誠博
碩斯歆祖考降饗以虞孝孫之心

迎送神歌

嗚呼悠哉日鑒在茲以時享祀神明降之神明斯降既
祐饗之祚我無疆受天之祐赫赫太上巍巍聖祖明明
烈考丕承繼序

征西將軍登歌

經始宗廟神明戾止申錫無疆祇承享祀假我皇祖綏

子孫子燕及後昆錫茲繁祉

豫章府君登歌

嘉樂在庭夔祀在堂皇皇宗廟乃祖先皇濟濟辟公相
子烝嘗享祀不忒降福穰穰

潁川府君登歌

於邈先后實司于天顯矣皇祖帝社肇臻本支克昌資
始開元惠我無疆享祀永年

京兆府君登歌

於惟曾皇顯顯令德高明清亮匪兢柔克保乂命祐基
命惟則篤生聖祖光濟四國

宣皇帝登歌

於鑠皇祖聖德欽明勤施四方夙夜敬止載敷文教載揚武烈匡定社稷龔行天罰經始大業造創帝基畏天之命于時保之

景皇帝登歌

執競景皇克明克哲旁作穆穆惟祇惟畏纂宣之緒耆定厥功登此雋乂糾彼羣凶業業在位帝既勤止維天之命於穆不已

文皇帝登歌

於皇時晉允文文皇聰明睿智聖敬神武萬幾莫綜皇斯清之虎兕放命皇斯平之柔遠能邇簡授英賢創業垂統勲格皇天

饗神歌

曰晉是常享祀時序宗廟致敬禮樂具舉惟其來祭普
天率土犧樽既奠清酤既載亦有和羹藁羞斯備烝烝
永慕感時興思登歌奏舞神樂其和祖考來格祐我邦
家敷天之下罔不休嘉

肅肅在位濟濟臣工四海來格禮儀有容鍾鼓振管絃
理舞開元歌永始神胥樂兮肅肅在位臣工濟濟小大
咸敬上下有禮理管絃振鼓鍾舞象德歌詠功神胥樂
兮肅肅在位有來雍雍穆穆天子相維辟公禮有儀樂
有則舞象功歌詠德神胥樂兮

晉江左宗廟歌

歌高祖宣皇帝

曹毗

於赫高祖德協靈符應運撥亂釐整天衢勲格宇宙化
動八區肅以典刑陶以玄珠神石吐瑞靈芝自敷肇基
天命道均唐虞

歌世宗景皇帝

景皇承運纂隆洪緒皇維重抗天暉再舉蠢矣二寇擾
我揚楚乃整元戎以膏齊斧疊疊神算赫赫王旅鯨鯢
既平功冠帝宇

歌太祖文皇帝

太祖齊聖王猷誕融仁教四塞天基累崇皇室多難嚴
清紫宮威厲秋霜惠過春風平蜀夷楚以文以戎奄有

參墟聲流無窮

歌世祖武皇帝

於穆武皇允龔欽明應期登禪龍飛紫庭百揆時序聽
斷以情殊域既賓僞吳亦平晨流甘露宵映朗星野有
擊壤路壘頌聲

歌中宗元皇帝

運屯百六天羅解貫元皇勃興網籠江漢仰齊七政俯
平禍亂化若風行澤猶雨散淪光叟耀金輝復煥德冠
千載蔚有餘粲

歌肅宗明皇帝

明明肅祖闡弘帝祚英風夙發清暉載路姦逆縱忒罔

式皇度躬振朱旗遂豁天步宏猷淵塞高羅雲布品物
咸寧洪基永固

歌顯宗成皇帝

於休顯宗道澤玄播式宣德音暢物以和邁德蹈仁匪
禮弗過敷以純風濯以清波連理暎阜鳴鳳棲柯同規
放勛義益山河

歌康皇帝

康皇穆穆仰嗣洪德爲而不宰雅音四塞閉邪以誠鎮
物以默威靜區宇道宣邦國

歌孝宗穆皇帝

孝宗夙哲休音允臧如彼晨離曜景扶桑坐訓華幄流

潤八荒幽讚玄妙爰該典章西平僭蜀北靜舊疆高猷
遠暢朝有遺芳

歌哀皇帝

於穆哀皇聖心虛遠雅好玄古大庭是踐道尙無爲治
存易簡化若風行民猶草偃雖曰登遐徽音彌闡悃悃
雲韶盡美盡善

歌太宗簡文皇帝

王 珣

皇矣簡文於昭于天靈明若神周淡如淵冲應其來實
與其遷疊疊心化日用不言易而有親簡而可傳觀流
彌遠求本逾玄

歌烈宗孝武皇帝

天鑒有晉欽哉烈宗同規文考玄默允龔威而不猛約
而能通神鉦一震九域來同道積淮海雅頌自東氣陶
淳露化協時雍

四時祠祀歌

曹毗

肅肅清廟巍巍聖功萬國來賓禮儀有容鍾鼓振金石
熙宣兆祚武開基神斯樂兮理管絃有來斯和一作說
功德吐清歌神斯樂兮洋洋玄化潤被九壤民無不悅
道無不往禮有儀樂一本無樂字有式詠九功永無極神斯
樂兮

宋宗廟登歌

王韶之

宋書樂志曰武帝永初中詔廟樂用王韶

之所造七廟登歌七嘗又有七廟享神登歌一嘗并以歌章太后其辭亦韶之造

北平府君歌

綿綿遐緒明昭載融漢德未遠堯有遺風於穆皇祖永世克隆本枝惟慶貽厥靡窮

相國掾府君歌

乃立清廟清廟肅肅乃備禮容禮容穆穆顯允皇祖昭是嗣服錫茲繁祉聿懷多福

開封府君歌

四縣既序簫管既舉堂獻六瑚庭萬八羽先王有典克禮皇祖不顯洪烈永介休祐

武原府君歌

鐘鼓嗶嗶威儀將將溫恭禮樂致享曾皇邁德垂仁係
軌重光天命純嘏惠我無疆

東安府君歌

鑠矣皇祖帝度其心永言配命播茲徽音息我茂猷如
玉如金駿奔在陛是鑒是歆

孝皇帝歌

烝哉孝皇齊聖廣淵發祥誕慶景祚自天德敷金石道
被管絃有命旣集徽風永宣

高祖武皇帝歌

惟天有命眷求上哲赫矣聖武撫運桓撥功竝敷土道